





P. 6. 44

oo K

Theologie  
P. VII 35t. 625.



Margarita Nuptialis,

VENERABILIV  
VENI, PIETATE, DOCTRINA  
ET PATRICIA DIGNITATE PRAESTANTI, D.  
CONRADO ALEMANNO, AD DIVVM NICO-  
LAUM apud Magdeburgenses Canonico, Orna-  
tiss: & prudentiss: Viri D. Thomæ Ale-  
manni, P. M. quondam Consulis  
Reip. Magdeburgensis  
meritiss: F.

Et

CASSISS: PVDICISSIMAE-  
QUE VIRGINI MARGARITAE,  
Honestiss: & Integerrimi Viri  
D. Casparis Steinbeccij,  
P. M. F. Sponsis.  
Donata.

à

GEORGIO RITTERO  
Hilperhusano.



Magdeburgi excudebat Andreas Gehen,  
M. D. LXXXIII.





**E**xpectata diu, felici sydere tandem  
Septima Septembris bis redit orta dies.  
Qua Sol extremos permensus Virginis ignes  
Efficat aequales noctibus esse dies.

Fervida nudatis despumant musta racemis,  
Et scisso mandat semina quisq; solo.

Patricio gaudens sponsus CONRADVS honore  
Hac celebrat thalami festa parata die.

Sit felix sponsis sociali foedere iunctis  
Lux hodierna cruci Christe dicata tuæ.

Autor coniugij Deus his precor annue votis  
Amborum, & sacris praesens adesto tuis.

Sis facilis casto sponso, castaq; puella,  
Pelle procul tædis quicquid obesse potest.

Ipsaetiam thalamo felices exerat ignes  
Cum matutino fulgida sole Venus.

Non Caurus pluvio contristet frigore caelum,  
Æolus & sistat flamina saeva Noti.

Et iam plena viro potiundæ copia nuptæ  
Fiat, & ambobus tædifer adsit hymen.

Quiq; ad connubij venerunt festa vocati,  
Pro sponsis fundant vota precesq; novis.

Ipsa ego dum sponso felices gratulor ignes,  
Legitimoq; precor prospera fata toro:

Ecce nouenarum Phæbo præeunte sororum  
Constitit ante oculos dulcis imago meos.

Sunt Musæ, nosco comites, Polyhymnia sacra  
Prima mihi visa est, altera Calliope.

Pande fores, te sponse volunt, tibi grata precantur,  
Nec dubitant sponsæ limen adire tuæ.

Margaridenq; tibi insigni pro munere portant,  
Excipias grata munera tanta manu.

Munera longinquis quæ nata feruntur ab oris  
Gemmas quas nobis Indica mittit aqua.

Calliope laudes gemmæ, Polyhymnia sponsæ  
Virtutes pandet carmine dulcisono.

Calliope. Iusse cum simus solennes risere tædas,

Quin age, nunc thalami concelebremus opus.

Polyhymnia.



- Polyhym. Quanam sacra tori modo nos ad festa vocemur,  
 Cara soror verbis commemorare velis.*
- C. CONRADI ad thalami sacrum, quod ritè secundis  
 Ominibus sponsæ MARGARIDI instituit.*
- P. Incipe Calliope preciosa Encomia gemmæ  
 Dicere, si quid habes, incipe Calliope.*
- C. Præstantem iuuenem præstanti munere gemmæ  
 Dono, dat illa meis verbaq; resq; modis.*
- P. Et nostris, virgo dulci quæ nomine gaudet  
 Margaridos, numeris verba modosq; dabit.*
- C. Et, benè si memini, gemmas sacra pagina adumbrat  
 Margaridas, dulces assimilataq; typos.*
- P. Nunc ergo cum nos non cura remordeat ullæ,  
 Nobis te paucis hæc aperire velim.*
- C. Sic sponsam Salomon preciosas vincere gemmas  
 Aferuit, quales India diues habet.*
- P. Et mercatori Christus caelestia adæquat  
 Regna, suo gemmas qui parat ære sibi.*
- C. Rebus quas Genitor fabricauit, signa iugalis  
 Insunt, crede mihi, ceu simulacra, tori.*
- P. Scilicet: insignem vicino in littore quærens  
 Margariden, diti est equiparandus homo.*
- C. Margaridenq; emit inuentam, ratione suarum  
 Exacta rerum, posthabitaq; domo.*
- P. Nec mora nec iuueni requies est addita, donec  
 In thalamum scandit virgo pudica suum.*
- C. Ergo Margaridos vis quanta sit insita gemmæ,  
 Incipiam versu commemorare meo.*
- P. Quantas possideat diuino munere dotes  
 Sponsa, pedes pedibus continuando, canam.*
- C. Principium precij cunctarum et culmina rerum  
 Concha tenet, qua non res preciosa magis.*
- P. Virgine nil casta toto preciosius orbe est,  
 Hæc palmam cunctas obtinet inter opes.*
- C. Margaridas nasci puras in littore gemmas  
 Iunctis ex conchis, haud dubitata fides.*
- P. Et casto in thalamo pulchras suauesq; puellas  
 Casta sibi genitrix procreat atq; pater.*

A ij

C. Sig.



- C. Signa equidem conchis insunt non pauca marinis,  
Quæ benè cum casta virgine conueniunt.
- P. Signa equidem pulchris insunt non pauca puellis,  
Margaridi gemmæ quæ benè conueniunt.
- C. Vere nouo, varijs decorante coloribus agros,  
Æquoreas conchas torret anhela sitis.
- P. Ætatis sic vere suæ sitit eger amicam,  
Et socio iuuenis gaudet amore frui.
- C. Mox pleno excipiunt cælestem gutture rorem,  
Nascitur hinc miris lucida gemma modis.
- P. Sic quoq; cum thalamus castos excepit amantes,  
Producit gemmæ nobilioris opus.
- C. Maior erit gemmæ species, si magnaq; concha est,  
Paruula si concha est, paruula gemma manet.
- P. Maior erit virgo claro de sanguine creta,  
Fit minor, obscuro quando ea nata loco est.
- C. Gemma tamen rutilo est auro preciosior, albus  
Si ros in conchas fluxerit æquoreas.
- P. Sic thalamus concors quouis preciosior auro est,  
Candida quem socio nutrit amore fides.
- C. Si concham nubes obscuro rore replevit,  
Sordescet grauidæ debile ventris onus.
- P. Turbida si nubes vitiorum obscurat amanti  
Pectora, in obscuro sic quoq; fœtus erit.
- C. Roreq; concepto, faueat nisi debita cæli  
Temperies, gemmæ pallor inesse solet.
- P. Mater si illicitos veneris sectatur amores,  
Illius roseo gnata pudore vacat.
- C. Quales diffundit surgens aurora colores,  
Margaridos tales Indica gemma trahit.
- P. Qualia sunt studia et virtus, moresq; maritæ,  
Tales gnatarum sæpius esse solent.
- C. Margaris argenti niueo splendore refulget,  
Clarus vbi summo Phæbus ab axe nitet.
- P. Casta etiam, pietate à matre instructa fideq;  
Pectora virgo tenet candidiora niue.
- C. Cum multo nebule circum Eos fundit amictu  
Æthera, splendoris gemma nihil capiet.

P. Cum



- P. Cùm maculat castos polluto pectore mores  
Ipsa parens, proles degenerare solet.
- C. Quem semel arenti concepit gutture rorem  
Concha maris sitiens, firmiter vsq̄ tenet.
- P. Quos hausit, seruat mores virguncula, namq̄  
Naturæ sequitur semina quisq̄ suæ.
- C. Cumq̄ suum stillans sedauit lympha molestant,  
Nascitur ex illo gemma liquore nitens.
- P. Moribus expleuit sic quando pectus honestis  
Sponsa, suo crescit gemma futura viro.
- C. Ipsa licet sit multiplici cute consita gemma,  
Purior artificis fit tamen ipsa manu.
- P. Si virgo inculta est, cura est adhibenda fidelis,  
Naturæ ut mores induat apta bonos.
- C. Pura solet longa flauescere gemma senecta,  
Torpescit rugis & cutis ipsa suis.
- P. Sic etiam amittit natiuum sponsa ruborem,  
Et faciem tandem ruga senilis arat.
- C. Non tamen ipsa minor fit gemma, sed auctior omni  
Ætate, et conchis hæret adusq̄ suis.
- P. Coniugium concors multos augetur in annos,  
Nec cum rugosa fronte senescit amor.
- C. Et nequit auelli à conchis, (mirabile dictu)  
Nec vis vlla valet, sit nisi lima tenax.
- P. Non vnquam seris illam mors auferet annis,  
Quæ coniuncta suo est corde animoq̄ viro.
- C. Concha manet domiporta suæ sub tegmine testa,  
Cum rapidam furum cernit adesse manum.
- P. Sic affixa suæ domui est, pudibunda latetq̄,  
Ne vitam maculet turpiter ipsa suam.
- C. Cumq̄ peti se propter opes sit gnara, sub vndis  
Has operit, vasti gurgitis ima tenens.
- P. MARGARIS & casti semper decus illa pudoris  
Seruat, et illicitos odit honesta toros.
- C. Integra quæ numeris teres omnibus atq̄ rotunda est,  
Gratior ante alias est ea gemma viris.
- P. MARGARIS illa placet, roseis affusa labellis  
Gratia quam decorat virgineusq̄ pudor.



- C. *Multa etiam nitidis insunt discrimina gemmis,  
Nec forma est eadem, nec color vnus inest.*
- P. *Sic pulchris etiam varia est natura puellis,  
Moribus hæc placida est, altera dura nimis.*
- C. *Vnio qui solidus, puro est preciosior auro,  
Lapsu non vlllo frangitur ille suo.*
- P. *Sic solida pietatis amans fert nescia frangi  
Pectora virgo, aurum vincit & omne simul.*
- C. *In gemmis vitium est specie quandoq; probatis,  
Atq; manu factis fucus inesse solet.*
- P. *Morbus inest cæcus lasciuis sæpe puellis  
Pronis in quoduis ferre cubile pedes.*
- C. *Optima sic est, quæ nullum est violata per vsum  
Gemma, suum seruat sed sine labe decus.*
- P. *Optima et est virgo quam forma pudorq; coronant,  
Inq; vicem niueo præstita corde fides.*
- C. *Est, mihi crede, parum preciosa gratia formæ,  
Ni vires habeat conscia gemma suas.*
- P. *Est, mihi crede, parum generosa gratia formæ,  
Ni laus accedat vera pudicitia.*
- C. *Arte laborota et mendaci splendida fuco  
Gemma oculos hominum fallere sæpe solet.*
- P. *Sic quoq; fucata species externa puella  
Enitet, et iuuenum pectora sæpe capit.*
- C. *Nunc quanta vtilitas sit gemmæ, quantus et vsus  
Sit conchæ, numeris enumerabo meis.*
- P. *Non minor utilitas thalami est, sed maximus vsus,  
Perge soror, versu subsequar ipsa meo.*
- C. *Nauta coloratis nobis quas portat ab Indis,  
Ægris Margarides pharmaca certa ferunt.*
- P. *MARGARIDI medicina sua est, qua sæpe mariti  
Rebus in aduersis damna leuare potest.*
- C. *Sanguineus mordaxq; ruens per viscera fluxus  
Margaridos sicca sistitur auxilio.*
- P. *Sic sanat fidi bene fida marita mariti  
Vulnera, quæ turpis cuspide fixit Amor.*
- C. *Si cui defesso languent in corpore vires,  
Gemma sua firmas nobilitate facit.*

P. Pro-



- P. Prouida nupta viro afflicto medicamina prestat,  
 Ut redeat menti, qui fuit ante, vigor.
- C. Cardiacis spes est in puris maxima gemmis,  
 Quæ sanant animos ægraq; corda leuant.
- P. Sic quoties curæ depascunt corda mariti,  
 Spem locat in firma coniugis ille fide.
- C. Quem vagus vrit amor, stimulatq; libidinis æstus,  
 Dextra ferat gemmam, turpis abibit amor.
- P. Turpis vt ex animo flagrante libido recedat,  
 In casto viuant fœmina virq; toro.
- C. Margarides morbos arcent, pro polline sumta,  
 Tristis & ex omni corpore pestis abit.
- P. Sic omnes vxor pestes in amore iugali  
 Et fugat atq; omni sedulitate cauet.
- C. Si quis voce caret, si linguæ perdidit vsum,  
 Hauriat hic gemmas, ilicò sanus erit.
- P. Siq; sedet tacitus curis vexatus iniquis,  
 Exhilarat mæstum sponsa pudica virum.
- C. Plura procul dubio gemmis sunt pharmaca, nobis  
 Quæ sunt hic nostris prætereunda modis.
- P. MARGARIS hæc sanat, quod non sanasset Iaspis,  
 Quam bona res virgo, quam bona castus amor?
- C. Mordaciq; tamen perfusa liquefcit aceto  
 Et redit in nihilum, quod fuit ante nihil.
- P. MARGARIS hæc etiam fati absumetur aceto,  
 Sed vitam acquireret, quæ sine fine manet.
- C. Quam tibi sponse fero, conchis modò creuit in Indis  
 Gemma, & quid doceat ritè marite tenes.
- P. Excipe quam mihi to sincera mente puellam,  
 Quæq; tibi cecini carmina mente tene.
- C. Non leue momentum est cœlestis copia roris,  
 Dote sua vt cunctas margaritis exuperet.
- P. Vt decus est inter cœlestis Lucifer orbes,  
 Virginei decus est sic mea gemma chori.
- C. Margaritis est mihi candida, quæ vitio caret omni,  
 Egregia forma est, & tibi culta satis.
- P. Comis, blanda, decens & moribus apta mariti  
 Sponsa est, quæ gemma nomen & omen habet.

Tu ma-



- C. Tu modò sponse faue , tibi fertur amabile donum,  
Cuius ab aspectu gaudia mille feres.
- P. Gaude sponse , tibi quoniam nunc ducitur Uxor,  
Quæ tua complebit pectora læticia.
- C. Margaris in pulcris rutilante monilibus auro  
Eximium vt collo , sic capiti dec us est.
- P. Grande tibi decus est tua MARGARIS , illa monile  
Baccatum gemmis vincit honore suo.
- C. Vnio MARGARIDI tu sis , tibi MARGARIS vxor  
Concha sit , vsq; sui nominis ipsa memor.
- P. Vnio CONRADO tu sis , tibi concha maritus,  
Atq; sui semper nominis ipse memor.
- C. Sis felix gemmamq; tuam complectere , cuius  
Et pudor & pietas & nitet ore fides.
- P. Sis felix , et viue diu cum coniuge casta,  
Quam tibi coniungit pronubus ipse Deus.
- C. Viuite felices , semperq; fruatur vterq;  
Sponse tua gemma , MARGARIS atq; viro.
- P. Viuite felices , quoniam felicia vestro  
Nomina promittunt omina fausta toro.
- C. Et quas sponsa dabit diuino munere gemmas ,  
Mille ferant matri gaudia , mille patri.
- P. Viuite concordēs , vna duo corpora mente  
Longaq; Nelidæ ducite secla senis.

FINIS.





























A3 52 5/k, 8

ULB Halle

3

001 943 405



sb







Margarita Nuptialis,

VENERABILIV,  
VENI, PIETATE, DOCTRINA  
ET PATRICIA DIGNITATE PRAESTANTI, D.  
CONRADO ALEMANNO, AD DIVVM NICO-  
laum apud Magdeburgenses Canonico, Orna-  
tiss: & prudentiss: Viri D. Thomæ Ale-  
manni, P. M. quondam Consulis  
Reip. Magdeburgensis  
meritiss: F.

Et

CASTISS: PVDICISSIMAE-  
QUE VIRGINI MARGARITAE,  
Honestiss: & Integerrimi Viri  
D. Casparis Steinbeccij,  
P. M. F. Sponsis.  
Donata.

a

GEORGIO RITTERO  
*Hilperhusano.*



Magdeburgi excudebat Andreas Gehen,  
M. D. LXXXIII.

